





道光壬辰年鐫

# 琴士詩鈔

古墨齋藏板

欽賜五品銜孝廉方正琴士趙君墓誌銘



國家選舉之法因明舊制常科外又有博學宏詞科有孝廉方正科以待异才魁彦士而孝廉方正之名尤美非文行相副不足以當之自

睿皇帝至

今上凡再舉皆於臨御之初用風示天下當道光元年余藩安徽咨於眾以琴士趙君首應

詔君故嘗辭府縣辟不就迨余採芻議特檄舉君涇令復親詣敦促始就道然年已七十不欲北上無錫孫文靖公時爲撫院乃以第一名咨部給



六品冠帶會有

旨俞余請修安徽通志遂以纂輯事任君凡在局五年志成同事歎其熟于史事條舉件繫詳贍有體云旋主講池州府之秀山太平府之翠螺兩書院殷勤教誘不稍倦道光十三年七月十七日卒於里距其生乾隆十七年正月初三日春秋八十有二君少好學九歲卽以能文稱伯祖侍御諱青藜公極喜之年二十應童子試以經解冠八邑受知於大興朱笥河先生拔入縣學旋補廩膳生朱先生竒其材手授以許氏說文

且言讀注疏日毋過一頁讀說文日毋過十字必精造乃已一時學侶咸推之屢薦棘闈不售遂棄去八比藝專力於經史百家及碑版書畫之屬罔不鈞考決擇惟精其所著書有新舊唐書互證二十卷通鑑注商十八卷建元考二卷校補竹書紀年二卷校補王氏詩攷二卷金石文鈔八卷續鈔二卷金石跋六卷涇川金石記一卷涇事一卷讀書偶記八卷消暑錄一卷古墨齋筆記六卷古墨齋觀書記八卷古墨齋書畫記一卷琴士詩鈔十卷文鈔六卷又輯其生



平師友詩爲蘭言集十二卷文爲同心言一卷  
輯其族人詩爲趙氏淵源集十卷又彙集涇先  
輩所著書數十種爲涇川叢書百餘卷皆行于  
世在志局時又另輯安徽人物志八卷安徽金  
石錄八卷待刊君性孝友處鄉里恂恂然終身  
樸學手一編窮日夜不輟當事重其爲人皆禮  
敬君曾未一私謁兩暑滁州訓導一暑廣德州  
訓導皆不數月而士林慕之依依不能捨教其  
人先行誼而後文藝其於邑公事有可以持風  
化蘇民命者未嘗不身爲之倡也以故遠近識

與不識咸謂行誼如君洵能不愧所舉云在嘉  
慶時是舉所得有吾鄉嚴公如煜安徽程先生  
瑤田嚴公

廷對策畧伯仲賈生其後著績漢南爲一時名臣而  
瑤田篤學爲諸生祭酒雖不出其志行均也若  
君者其瑤田之偶歟君諱紹祖字繩伯號琴士  
其先出宋之宗裔曰不吝者由河南來遷世爲  
涇之東隅人曾祖崇濟祖際飛考良猷皆以文  
學列名庠序配倪氏有淑德與君同歲生後君  
一月卒子國楨孫同璋俱縣學生曾孫二鵬飛



蛟起元孫三如錐如鏘如鏗君逮事王父下見  
元孫道光七年以七葉衍祥

欽賜勳額加賞緞疋以修城董勸勞

欽加五品職銜其卒也涇人士呈請祀於其鄉將以

某月日葬某山國楨前卒同璋主後來請銘銘

曰

吾聞之三代以下習俗莫美于漢京自科舉帖

括起而士多遺實而趨名惟我

國家執權持衡既舉大比以鵠羣英復有制科以

廣子旌有儲其叟研古敦行于涇之原拓書滿

楹恒窮年以矻矻惟心耘而目耕炯靈光其上  
燭感藜火而下視乎星精猗彼何人其通德之  
鄭氏歟抑傳經之伏生

賜進士出身

誥授榮祿大夫 太子少保兵部尙書兼都察院右

都御史總督江南江西等省地方軍務糧餉兼

管南河操江兩淮鹽政

賞戴花翎前江蘇巡撫安徽巡撫兼提督銜安徽

布政使福建山西按察使川東兵備道吏科掌

印給事中戶科給事中掌陝西道江南道監察



御史巡視南漕巡視中城東城察院翰林院編

修充

國史館纂修官加八級安化陶澍撰



趙琴士徵君傳

徵君姓趙氏名紹祖字繩伯琴士其號涇人也趙本邑望族多文學彥君考諱良猷有聲庠序早世母翟守節撫君暨君弟繩祖君九歲即能文伯祖侍御星閣先生極賞之弱冠值督學大興筇河朱公以古學倡導東南得君經解卷博瞻淵茂拔冠八屬并授許氏說文令肄習既補諸生旋食餼名震一時顧屢薦棘闈不售由是屏棄時趨專殫力考訂鈎鉅抽繹務求精要平生澹嗜欲惟日夕手一編不輟竟矻矻終其身性孝友母素善病君偕配倪氏躬侍湯藥勿敢



懈或出館晨昏必歸定省如此者凡三十八年弟體羸教養成立同室至老無稍間待宗黨獎掖後進備盡誠慤久之聞望愈孚邑中公事苟可維風化蘇民命輒爲之率遇有工役往往請首任嚴寒溽暑絕不言瘁嘉慶丙辰府縣欲辟孝廉方正力辭而罷逮道光辛巳方伯今制府陶公採輿論特檄舉君縣令親詣敦促始就道尋奏名第一自揣衰齡難北上會修安徽通志畱君纂輯志成羣嘆爲詳整有體嘗兩署滁州訓導一署廣德州訓導僅數月而士林慕嚮依依不忍別繼主池州之秀山太平之翠螺兩書院君

外和內肅持已端故誨迪先行而後文當事禮敬君君不肯通私謁在志局彌謹晚乃以修城董勸勞欽加五品銜道光十有三年秋七月十七日卒年八十二合邑推重呈大吏崇祀鄉賢余與焉咨部以聞報可僉謂不愧云君之學無弗窺究而尤深於史最著者一曰通鑑注商注爲元胡三省之書與其所著釋文辨誤相輔而行本極賅洽君參研抉發至六百餘條視顧氏炎武日知錄所列及陳景雲之舉正不啻倍蓰一一有成處可覈間或原注未晰爲加疏通不欲輕訾前哲卽通鑑小有牴牾亦推闡其故意在



實事求是而已一日新舊唐書互證於劉昫竝歐宋之書無所偏徇然其間摘新書者十之八九蓋舊書尙具班范之法近世儒者多表其長新書專修文詞又減削字句轉致詰屈其考証頗疎同時吳縝已有糾謬之作但縝因乞預官屬不得挾私憾有意吹索而君因平心以救其失初不存門戶之見於胸中也此二書實裨益正史必傳無疑君又篤好碑版偶見諸市肆不惜重價購歸悉心檢閱謂可補史傳之遺也成金石文正續鈔共十卷雖仿明都穆金薤琳琅之例而皆其所未收審諦亦較勝穆所已收并蒐羅

斷缺之本爲金石跋六卷中如漢太室石闕銘已漫漶而顧亭林錄其殘字崇高作嵩高不知說文有崇無嵩崇卽今之嵩字也他所舉類是若唐幽州昭仁寺碑鄭州等慈寺碑謂太宗馳驚遠略徒以立寺薦福贖殺人之咎議論正大更非恂猶愁儒所能及在家既有涇川金石記一卷修志之暇別撰安徽金石略八卷與人物志八卷稱合璧足徵其無地不學也經學雖無專書而讀書偶記八卷前三卷胥以說經揆厥旨趣於易兼取漢京房虞翻與注疏本程子易傳朱子本義折衷以期其當于書不左袒東晉古文



而謂梅鶯及閻百詩惠定宇等竭力掎擊亦各自有罅漏正持平之論其餘諸經都能穿穴而喪服尤詳祥禫諸制準之情理曲折通達堪羽翼鄭注第七卷有論韻學謂用古音當擇其信而可徵者吳才老之韻補陳第之古音考顧氏之音學五書皆有得有失不可盡從蓋析其源流不徒作調人以解難又謂古韻今韻皆不必無方音詩騷用韻有限今以四聲中曾有數字同用而舉其全部以從之非也此論最允余亦曩所主持卽斯而觀知君之於經決非泛然涉獵者可比校補古書則王氏詩考二卷厚齋掇拾三

家逸文明董斯張補之近朱竹垞補之而君復摘董朱二家之罅漏而辨正之竹書紀年二卷歷引史記漢書山海經水經注宋書符瑞志史記索隱正義等條理甚密維揚陳君逢衡作集證擴充繁衍然時採其說陽湖洪稚存編修見之膺服爲製序顧謂引羅泌路史乃千慮一失不過因其爲宋人之書而輕之按路史雖不免龐雜而援据浩博著錄四庫引之第證其異同未嘗以路史駁竹書豈遂爲病哉外此短簡若涇事一卷紀述遺聞建元紀消暑錄閒中涉筆要亦矜慎不苟於戲君之學可謂閱其中而肆其外



矣君古文宗昌黎以夙熟史事集六卷內論數首識力卓然詩十卷大抵不屑屑綺麗上沿盛唐之派兼工書畫旁及於奕在他人得一已擅場而君直視爲餘技至哀香之編非由已撰獨彙鄉先輩著作數十種積貲刊布曰涇川叢書與本邑鄭漢林涇川文載同功其評隲師友本族詩及制藝特選家事故不書舊史氏曰近代撰著之富莫若蕭山毛氏奇齡然毛氏負氣求勝紕繆百出才雖雄不如君之醇也且君行誼亦遠過特嗇於遇又以樸學處僻壤未極烜燿余曩直史館與纂儒林文苑傳外省呈卷帙甚繁顧

罕似此者君與余同邑非敢阿好諸書具在明者自識之今叙述君事用略疏其梗概蓋欲使後之人修志乘得有所據依而載焉

道光十有六年歲在柔兆涒灘涂月之吉里人朱琦  
撰



皇清欽加五品職銜辛巳孝廉方正趙公琴士先祖  
府君行狀

府君諱紹祖字繩伯號琴士安徽涇縣東隅人  
自宋諡簡靜諱不吝公由河南遷涇至府君凡  
二十一世曾祖諱崇濟國子監生懿行詳載郡  
邑志祖諱際飛庠監生父諱良猷增廣生屢試  
冠軍有聲庠序所著有論語註叅竹坡詩鈔母  
翟讀書知大義精醫理

旌表節孝生二子府君居長次諱繩祖歲貢生候選  
訓導府君生有異稟幼在懷中曾祖及曾祖母



即教以千字文三字經唐詩等書過目輒能成誦六歲受業于舅曾祖翟雲樓先生先生與高祖皆好奕時方各習一經授毛詩畢即教之奕不數日而遂精于奕侍御伯高祖星閣公

予告在家奕傾一時兩主浙試累與施范相遇受不過

二三子聞之呼與奕不踰月即近似焉伯高祖嘆曰是終于此必能與施范埒然甚可惜也乃囑高祖與曾祖授府君九經及史漢等書九歲即能文神童之名震一邑然屢試見厄年二十一大興朱竹君學士筠督學安徽嘆其經解古

茂淵懿不獨以淹博見長特取以冠八邑始以第二人拔入縣庠且手授以許氏說文而教以讀書之法曰讀註疏毋過半頁讀說文毋過十字贊嘆不置欲攜以去以曾祖母多病辭之次年食餼屢試高等而鄉闈十餘次竟數薦而未得一售于是屏棄一切專肆力于攷據之學憫邑自有明以來鄉先輩著述有未刻者有已刻而版無存者與先叔祖彙集數十種爲涇川叢書鐫之以永其傳性耽金石雖斷簡殘編不惜重價以購歸則徧檢史籍悉心校核擇其文之



行狀  
完好而都氏所未收者爲金石文鈔八卷續鈔  
二卷其都氏所已收以及殘闕不全者別爲金  
石跋六卷又涇川金石記一卷涇事一卷尤備  
一邑掌故焉于史深于唐書及溫公通鑑手加  
丹黃者數過著新舊唐書互證二十卷通鑑註  
商十八卷輯生平師友詩爲蘭言集十二卷文  
爲同心言一冊又別搜合族深于詩者爲趙氏  
淵源集十卷餘所著有讀書偶記八卷消暑錄  
一卷建元攷二卷琴士詩鈔十卷文鈔六卷所  
校補則有竹書紀年二卷王氏詩攷二卷以安

徽通志無金石一門特輯安徽金石畧八卷尤  
愛陶雲汀制府蜀輜日紀皇華詩鈔爲彙刻之  
以誌不忘知遇外所著安徽人物志八卷古墨  
齋筆記六卷古墨齋觀書記八卷古墨齋書畫  
記一卷皆繕寫成書尚未付刊府君子于書無不  
讀于藝無不窺精賞鑒工書畫小楷專尚黃庭  
端木雲樵先生謂得晉人真髓行草則以爭坐  
爲本而尤肆力于晚香堂十卷梁聞山公嘯姚  
姬傳公鼐皆謂得其神似畫則不肯多作而索  
畫者往往過于書四十以前兼尚舉業于制藝



嗜大士望溪于詩嗜盛唐及明七子于文嗜昌黎文公四十以後專事樸學在館則日夜一編手鈔不輟在家則酬應紛繁夜必手鈔千餘字雖漏三下猶熒熒一燈如數而後止性孝友先叔祖少十歲躬自教養至于成立同居一室至老無閒鄉黨無不欽其友恭先曾祖早世曾祖母多病叔祖體又素羸府君與祖母躬侍湯藥未嘗少懈雖出館于外晨昏必歸溫清定省不敢或閒凡三十八年如一日嘉慶元年邑尊鞠溪先生欲以孝廉方正舉力辭而罷道光元年

太子少保陶雲汀制府時爲安徽藩憲素耳府君名詢及邑尊邑尊屢自造門力勸就徵府君亦感制府知遇之恩欲自謁謝遂就道焉時仁和胡書農學士督學安徽先與府君遇于滁州見手版驚曰余謂先生古之人也分校全唐文時法詩龕前輩曾授所著金石文鈔余于此頗得力焉至是見府君就舉亦甚欣然晉省考驗制府中丞無不愛重奏爲安徽第一以年老不能入都卽留在省分修安徽通志一時大憲多舊相職而未嘗輕一干謁汪芝亭觀察時爲首



行步  
府四十餘年舊交往來尤密而品評書畫商權  
詩文外無一語稍涉干請故知之者俱謂人品  
在學問之上。一署廣德州訓導兩署滁州訓導  
率不過數月去之日傾城祖送半皆泣下。晚主  
講池郡秀山書院太郡翠螺書院教士子者一  
如在家教子姪不以功名爲急而以行誼爲先  
未嘗有疾言遽色而外和內嚴見者肅然族黨  
姍戚無不師承父事以故邑有公事當事必虔  
請首任如修縣志建文昌宮造幕溪橋重建桓  
簡公祠及

旌表合邑節孝建祠豎坊無不躬自督理雖嚴寒酷  
暑朝夕不懈尤好施與有來求者必不忍拂其  
意遇公事或歲歉竭蹶樂輸爲鄉人倡家雖以  
此中落而合邑亦以此愈信重焉道光八年王  
公友仁以潁郡通判來攝縣篆目擊城垣頽敗  
不堪進合邑紳士重議修造俱謂非府君首事  
不可工竣聞于朝蒙

恩欽加五品銜府君猶謂家貧力薄不過自盡其心  
而此一役忽邀異

恩寔感踏不安蓋府君性好謙抑當徵辟時同徵之



者儒碩學無不欽承而府君自以爲濫叨首薦  
倍增慙慙凡後生小子有一善足錄一藝足取  
者無不誘掖而獎進之以疑義來謁者必廣繙  
書籍而切指之以書畫來干者雖賈豎無不應  
之自朝至于日昃毫無厭倦生平淡嗜慾節飲  
食以故年登大耄神明不衰六月下旬自姑孰  
歸猶作長聯蘭竹十餘幅以贈同好七月初四  
小有不怡然來視疾者談笑晏如出必自送之  
門外惟手顫不止十六日晚尚觀書至二鼓而  
不意于次日竟成永訣也嗚呼痛哉卒之日無

一語及家事唯曰淋雨爲災大江南北圩已盡  
破人何以堪其實此時雨尚未爲淋水尚未爲  
害自府君卒後不十餘日而果然蓋此時已有  
先知之神矣府君生于乾隆壬申年正月初三  
日子時卒于道光十三年七月十七日未時享  
年八十有二配祖母倪宜人系出名門年十七  
歸府君曾祖母已抱病在床一切家事惟宜人  
是倚晝夜侍疾毫無倦容合族皆以爲孝婦與  
府君相處六十餘年相敬如賓府君性好客四  
方友朋有投止數月一年者一切飲食必親加



檢點曰毋使遠客謂久而不能敬也族中人教女子必曰有如某宜人無不欣羨而敬畏之後府君九十三日生乾隆壬申年四月初七日辰時後府君二十八日卒道光十三年八月十五日卯時生男子子一即先君子諱國楨邑庠生邃于經學有文名先卒孫一即不肖邑庠生曾孫二鵬飛蛟起俱業儒曾孫女四元孫三如錐如鏜如鏗道光七年以元孫如錐生蒙

恩賞給緞疋并七葉衍祥匾額道光十年年屆八旬族中人欲以梨園佐觴堅不許曰余自幼不喜

絲竹今老矣其反堪此嘈雜乎蓋生平不嗜聲色不信堪輿不持齋不佞佛在家不問卜出門不擇日自謂不知有失意事嗚呼人世以百年爲上壽府君與宜人精神強固步履康莊人皆謂上壽可期而孰意不及一月竟同棄不孝而長逝哉嗚呼痛哉此非不孝罪大惡極奉養有缺調護無方以致我府君與宜人至於此極歟尚何言哉尚何言哉苦塊昏迷神魂俛俛欲縷述生平之嘉言懿行以告當世而語無倫次百難舉一惟念有道之仁人君子以發潛闡幽爲



已任憫不孝之愚而宥其罪俯賜誌銘以光泉壤則死亦有餘榮焉

不孝孫 同璋 泣血稽顙謹述

賜進士出身刑部主政姻姪翟發宗頓首拜填諱

琴士詩鈔目錄

卷一

樂府六十三首

卷二

小樂府六十七首

卷三

五古五十八首

卷四

五古三十二首

卷五



七古四十六首

卷六

七古四十七首

卷七

七古二十一首

卷八

五律九十四首

卷九

五律四十七首

卷十

七律九十六首

卷十一

七律二十八首

五絕七十六首

六言絕詩十三首

卷十二

七絕一百九十三首



琴士詩鈔

卷一

涇縣趙紹祖著

孫同璋曾孫

鵬飛  
蛟起  
同校

讀史樂府

庚寅七月余染時疾仲秋後小瘳猶未能  
出戶也悶坐無聊因取架上史隨意觀之  
偶有所得輒摘其中三字以為題久而成  
帙遂痛加刪節依世詮次存其半若干首  
本以適意遣疾非敢步趨西涯與西堂也

魯星村曰琴士讀史諸樂府雖不脫西涯  
蹊徑而大段不甚着議論多取史中成語



奏合而成其用意乃使人於言外領之計  
 琴士是時年未及冠而識力已如此真未  
 易才也西堂兩先生見之應歎後生可畏  
 使又曰琴士賦才穎異超齡即為諸先輩  
 所器詩於古今體俱能超出恒蹊而讀史  
 諸樂府尤傳誦一時楊廉夫李西涯而後  
 不愧嗣音使遇漁洋定當採入談藝未得  
 以孫尤諸作便  
 足據其上席

河圖瑞

涿鹿擒蚩尤畚山合符節夢授河洛圖大魚沂流  
 而上水活活得其五要靈臺設自六相治天地無  
 闕下有五官各有職司作甲子占日占星占風占  
 月隸首作算伶倫樂成律度量衡于是名雄鳴六

雌鳴六制十二簫以象鳳皇之鳴屈軼奇草生階  
 庭佞人不入四海澄清盛春谷曰諸樂府變態百出須得此正大之章壓之

八駿馳

徐偃如不作天子王心不為祈招止車轍馬跡遍  
 天涯快哉西狩可忘死可憐楚澤膠涇舟昭王魂  
 隨漢水流不問水濱問蒼漢八駿馳向崑崙邱瑤  
 池王母留賓客為王作謠聲啾啾未聞手贈不死  
 藥秦皇漢武何多求

周轍東

姜后待罪永巷中宣王致此中興功屢弧箕服亡



周國得媳不與阿姑同裂繒不肯笑夜半傳舉烽  
美人粲然啟玉齒犬戎已至驪山宮宜曰大仇忘  
不報惜哉周轍自此東岐豐千里棄如屍秦與齊  
晉來爭雄一敗便至售田宅百世而下慨歎失策  
有蘇公

申生怨

驪姬夜半泣擁衾太子構禍禍將深置宮六日肉  
有毒君奚不察怒不禁欲辭姬有罪母乃傷君心  
欲行誰無父蒙此殺父名辭伯氏縊新城父命殺  
兒兒敢生偏衣金玦兆已見惜不早從狐突行

歸三帥

前年戰殺去年戰彭衙今年復自王官濟實由三  
帥歸秦家武夫力諸原婦人免諸室墮軍長寇亡  
無日秦強固有端晉亡非此失失在強臣非敵國  
君不見函谷關開三晉臣妾蠶食非復舊桐葉

一日失在強臣非敵國一語轉捩有力

吳宮樂

吳王老邁忘舊釁苧蘿村中美女進帳下新添歌  
舞人立庭無復殺父問美人倩粧來西苑吳王沉  
醉吳宮鍵明眸皓齒盼瓊筵愁思隨秋入歌管銀



壺金箭曉漏長東方漸高憎夜短秋江夜夜漲寒  
潮空使胥濤流恨滿爾時長頸會稽王含膽草中  
睡不穩章犀臺曰收筆含蓄入妙

夷門行

信陵公子意氣豪誰所從者薛與毛夷門盛禮下  
侯羸河西一戰走蒙驚或博徒或商賈虚心求英  
賢下交無愧阻空有門下三千人平原孟嘗徒豪  
舉延上座稱國士受君恩為君死知己之感洵如  
此不然七十老翁豈無求向風刎頸送公子伯甄溪曰

收筆陡絕即右丞語翻轉別見一意

易水行

田光以死激荆卿燕丹祖餞易水行壯士手提三  
尺劍去去不顧期功成悲歌一聲聲變徵髮盡衝  
冠皆奮起出燕城兮入秦關氣如虹兮心如矢七  
首中柱不中王秦王不死荆卿死嗚呼漸離筑於  
期頭後先死義真堪儔武陽豎子何足尤惜哉荆  
卿所欲與俱客終古不聞來為燕報讐

鴻門宴

沛公單騎來會楚鴻門事急如履虎玉玦三提王  
不顧項莊拔劍筵前舞筵前樂寧獨舞與莊對舞



翼沛公同姓老人自擇主賣君賣國如市賈楚亡  
入漢受上封剖符亦與雍齒同漢王當日誅丁公  
如何乃賞項伯功不如責之以叛楚面數其罪勵  
臣工太公免烹伯有力赦而封之酬勲庸刑正恩  
報誠至公

太公箠

天子尊矣奈何以父卑之君臣為公父子為私父  
實酒掃吏耳奈何可屈天子迎門擁箠太公亦見  
之晚矣豈不聞楚軍將烹汝馬上分羹語伯甄溪  
曰奇譎  
語以冷然  
之筆出之

刀筆吏

未央殺韓信國門懸彭越留侯早識機諸公何能  
脫獨存刀筆取公侯巍巍功業昭千秋韓既亡彭  
既死英布盧縮皆受誅數百英雄一網耳漢皇不  
殺刀筆吏蕭曹諸公可知矣龔欣書曰  
句中有句

鄧通錢

黃頭兒郎衣後穿手推天子上青天銅山千里富  
獨專銅山不窮雪山倒至死不得名一錢始知天  
子雖崇隆不能救此餓死翁縱欲造命無天工君  
不見鄧通汪醒弁  
曰峭極



飛將軍

飛將軍不鳴刁斗不陳兵  
大黃一挽匈奴驚百騎  
突過單于營衛車騎霍  
驃騎紛紛馬上取卿相  
胡獨將軍不得意結髮  
從軍六十年何能復對  
刀筆吏入幕府掣吳鈞  
一軍痛哭聲啾啾英雄  
所貴名傳耳快心何必  
在封侯

龔欣書曰  
慷當以慨

天馬來

天子欲爲椒房謀將侯  
姬兄未有由軍功可建  
侯可致不見衛霍皆從  
馬上得封侯貳師將軍  
出宛野萬里去求汗血  
馬數十疋駿歸彤庭六  
七萬人

死邊下天馬來西夷服  
天子賞功廣利侯一家  
歡笑萬家哭中原馬少  
人頗多人能易馬快如  
何蒲梢蹋石自是天家  
瑞詞人拜手稽首弭筆  
共上天馬歌

二疏歸

父爲太傅子少傅賢哉  
疏家二大夫仕宦今至  
二千石富貴如此何所  
圖不如父子相隨出關  
去到家家有舊田廬子  
孫耕之足自娛即日連  
疏乞骸骨帝曰念哉哀  
黃髮賜金賜歸辭玉闕  
羣公祖餞冠蓋集道旁  
觀者皆感泣知足不辱  
誠難及君不



見蕭傅剛方稱有素一旦用事讒人妬果然殺此  
賢師傅

### 昆陽捷

莽兵百萬昆陽東雲車十丈瞰城中旌旗蔽野焰  
燒空劉將軍秀潛龍種見小敵怯大敵勇直前決  
戰諸將竦敢死壯士人三千城西水上衝中堅內  
外鼓譟聲震天雷公鞭龍風怒吼水溢瓦飛雹如  
斗虎豹股戰皆退走王尋授首莽勢挫昆陽將士  
酌酒賀莽身未死莽膽破定策捍敵真無方漢業  
不墮高有光一成一旅古少康

### 矜一顧

仕宦當至執金吾娶妻當得陰麗華平生志氣祇  
到此帝業何以恢漢家高祖有仲光武有兄孰多  
孰少皆偶爾所就未足觀豪英君不見光武微時  
同輸賦嚴尤何人奚足數尙向朱卿矜一顧

冷絕

汪醒  
弁云

### 羊裘叟

朗朗客星犯帝座夜來朕與故人臥我是山人非  
帝佐被我羊裘持我竿仍去大澤灘頭坐灘頭坐  
莫以公卿來辱我漢家小吏待公卿簿書猶得免



奇禍不如羊裘釣月明  
躑躅山高與水清  
天邊之鴻飛冥冥

伏波怨

馬君章句不能守亡命北地隴  
漢走遨游二帝臣  
擇君交趾功成綰紫綬  
交趾潦霧毒重蒸  
飛鳶墮水人安受  
一旦功立蒙大恩  
擊牛饗軍醜美酒  
丈夫會應馬革裹  
豈能坐死兒女手  
六十老翁不肯休  
誓向五溪臯羣醜  
據鞍顧盼徒為雄  
帝曰矍鑠哉是翁  
武陵大星落前軍  
松固讒言何紛紛  
妻孥惶懼不敢葬  
猶是善保功臣君  
窮當愈堅老愈壯

竟使晚節遭疑謗  
祠堂封樹搖松楸  
風雨慘澹黃泉愁  
人生何必貴封侯  
優游鄉里真樂事  
應憶平生弟少游

苟作生弟少游

盛春谷曰猶是善保功臣君一語乃令我為漢唐至明功臣一哭琴士之詩豈

者耶

杜外家

聯姻帝室人所崇  
大者滅國次滅宗  
不見竇霍禍相繼  
一門西市泣秋風  
竇霍之禍不足數  
周公忽來移周祚  
玉璽投地悔已遲  
此錯實由文母鑄  
馬后神明真足嘉  
預杜外戚防淫奢  
帝子不並先帝子  
馬家那得比陰家  
嗚呼小梁貴人金殿坐  
李杜



駢首漢業墮外家又見梁冀禍

姜肱被

尺布縫斗粟春煮豆燒其泣何窮嗟嗟兄弟不相容豈知世有姜家士晨昏卧起相追從姜家被孔家梨田家紫荆枯又稊董家雞來哺狗兕昔有如此今知不知

鄴都引

建鄴都築銅爵漢賊自有真漢相安可託橫槊賦詩徒爲雄賣履分香氣俱索吾子房吾樊噲天命在吾宜養晦能使人表漢將軍胡爲疑塚疑千載

呂布戮袁紹走鞭箠宇內殄羣雄虎嘯狐鳴俱授首一時豪傑不乏人屈指無能出子右惜哉漢治不復隆不能使子爲能臣乃竟使子爲奸雄

漁洋過

顏回不死袒且裸脫衣着衣從容坐父母遺形潔且清衆人見之何不可淵淵過作金石聲四座慷慨氣縱橫本欲辱衡反辱孤假手荆襄其殺諸傲玩從來不自全嗟哉黃祖誠庸夫死如歸生如寄灑盡千古才人淚萋萋芳草鸚鵡洲何如疑塚七

十二

龔欣書曰傲玩句括盡千古才人之禍



奔袁軍

丈夫不為金帛誘極知曹公待我厚要當報恩便  
 辭去劉公親吾左右手恩既報袁軍走吾君在袁  
 安敢後左右欲追操曰否壯士亦各為其主如公  
 正氣留千古如公光明感格人老瞞詐諛消肺腑  
 留公不得任公行曹公猶是人中虎白衣搖櫓進  
 吳兵孫權如狗呂蒙鼠

濡須戰

阿瞞殘破荆襄日乘勝進軍又南出長江風急火  
 轉疾百萬雄軍俱覆沒春已至多雨水濡須孤城

不可恃頓軍在此徒勞士生子當如孫仲謀文臺  
 伯符為不死天壤乃有景升子景升子豚犬耳

村曰更不着  
語神韻悠然

自憂諡

扶人目鑿人皮江南酷刑何所施臣弑其君其當  
 之皓有辭充默愧可憐臨死自憂諡嗟哉此非豫  
 州子社稷輸人寧勿耻君何耻司馬昭心路人知  
 君鷹犬耳何足齒君不見陳泰慟哭貴鄉死獨有  
 斬充以謝耳昭言當更思其次泰言但有進於此

魯星村曰陡然竟住令我厭百  
回思此妙乃拔竒於西涯之外



除三害

長橋下蛟南山上虎蛟擁長江虎食人縱肆况有  
周郎處三害耳無大慮父老休矣無怨詛射虎殺  
蛟讀書去讀書之功功何窮致死始見讀書功射  
蛟殺虎何足雄

華亭鶴

華亭鶴唳何哀哀陸君兄弟世奇才欲聞不得心  
傷摧夙喜談兵何為哉釋戎衣著白恰臣無二心  
讒言劫三族市朝灑熱血猶遺後人議名節三江  
水可飲南山蕨作菜此時季鷹歸江南笑傲秋風

食蓴膾

侍中血

金墉耶願勿忘頽上耶願勿忘黃橋耶願勿忘安  
不忘危國乃昌君臣交忘戰不止八王搆禍禍方  
始蕩陰飛矢及天子侍中衛帝帝幸生血濺帝衣  
侍中死中散琴侍中血中散死琴已絕侍中死血

還熱

章犀臺曰  
格調獨創

無宦情

寧馨兒自言無宦情汲汲嘗為三窟營破壞天下  
豈非君遂使神州頓沉淪車前下拜胡將軍惟勸



將軍早稱尊無宦情勸稱尊天下乃有此輩人浮  
虛無補排墻日狡兔始知無一窟

枋頭敗

瑯邪內史非常婿委之方面可濟國不能流方便  
貽臭但得功成受九錫燕秦并力不可圖枋頭敗  
歸歸無色温枋頭操赤壁三江一夜東風急鐵騎  
八千破襄邑不然還朝威震主漢鼎荆榛晉鼎泣  
君不見寄奴平亂克秦歸東堂半夜帝鬼啼長星  
竟天明月低

章犀臺曰中間忽入一比全無痕跡

淝水捷

會稽求助鍾山神八公草木蟠輪困秦人遙望心  
震驚此亦勅敵何可輕淝水一麾軍却走風聲鶴  
唳疑躡後投鞭斷流眾何有羽書報捷中外悅謝  
公得書置勿閱揮塵閒對圍棋客小兒破賊徐徐  
說歸來不覺展齒折

章犀臺曰一結傳神妙在不浪費筆墨

比蘇武

什門在燕氣不折衣裳破傲心如鐵和龍久住還  
平城二十四年不少屈是時南朝多難秋衣冠重  
利輕名節傳與謝晉大臣褚與王宋貴戚絕域乃  
生蘇屬國



清河吏

不能彎弓持矛盾胸中所懷過甲兵馬鄭王賈皆  
大手著作應遜司徒精味卿言如鹽酒知人如卿  
古未有知人如卿夙有準何以不能知邳閔可憐  
死後慚高允

北伐議

江南赤地無人烟春燕歸巢林木端石頭城下烽  
連天元嘉之政皆蕭然臣上封禪書君封狼居胥  
草草建此北伐計白面老僧與同議獨奈何耕不  
問奴織不問婢始悔早殺檀道濟

逆劭變

東宮巫蠱赦不誅合殿平旦競喧呼楚宮商臣惡  
復見始知古籍非傳誣宜殺耶袁皇后當斷耶王  
僧綽坦懷如初既不能以義割恩又中却屏人繞  
壁徒爲爾謀及婦人宜其死君不見彭城之罪不  
至此但能斷弟不斷子

移吾牀

人生何必計門戶僧真堂堂邁儕伍一生富貴何  
所須但從陛下乞作士大夫士大夫非朕命江家  
謝家執此柄爾自詣之應不應詣尙書登榻側甫



坐定距踰尺移吾牀遠俗客

魯星村曰祇用成語結構而成不更着一

毫議論真是妙筆

### 進生金

蕭家老僧猶好生欲徙巴陵南海坐沈約進言大不可莫以虛名受實禍生金進王王就死沈約猶是讀書子文人刻薄乃至此約有筆任為耳紀載貽譏同穢史約有舌慎哉夢中早見和帝來

### 臺城怨

麴為牲實璉瑚民竭血建浮圖前後佛寺三捨身尊為天子卑為奴叅禪趺坐何瑣瑣金甌不缺已

暗墮白馬來壽陽蒼鷹擊殿左豆羹糲飯徒自苦江南處處俱烽火臺城不救老僧饑八十天子竟及禍伽藍然燈何紛紛儼然同泰寺中坐

### 明月謠

百升飛上天明月照長安長安士庶見明月盲人不見明月色怒月懼月知月逼劍上青天落月魄明月不照中河水中河夜半聞椎聲周師百萬燒鄴城燒鄴城明月死明月不死奚至此

吳柳門曰清光滿紙

不使一筆直

### 奈何帝



奈何帝奈何帝防江無一策入井自有計牀前未  
啟告急封京口空傳斥堠烽嫦娥不向月宮坐依

稀井底生芙蓉

伯甄溪曰李長吉無此妍妙魯  
星村曰温飛卿詩繡龍畫雉填宮

井與此有  
仙凡之別

錦帆東

楊家阿羅亦英雄混一南北并江東獨孤誤我悔  
不及錦帆直到江都宮河邊白骨積如土鏡裏好  
頭笑自悔何須夢到吳公臺迷樓結綺俱塵埃  
脂宮井水空碧二十四橋月自來得於煬失於煬  
盛衰倚伏又何傷洛陽之芒山江南之雷塘當年

安用深相責一般秋草起蒼涼

桃林怨

蒲山公子目如電牛角漢書掛一卷當時三策干  
元感鼓行而西亦虛見坐據洛口竟何成驕氣可  
憐盡一戰烏江恫桃林怨艤舟不渡死亦豪倉皇  
不似邢峴箭也應愧讀項羽傳

斬建德

豆入牛口勢不得久唐倖勝耳非可狃今不自來  
恐煩往取理勢自然語非苟歸道宗釋李勣與唐  
有恩非仇敵高祖神武知英雄不斬世充斬建德



除佛法

除佛法碎佛齒西僧呪臣僧自死中原大蠹已千  
年快意之事那有此地獄之設爲斯人蕭瑀真是  
空桑子高識傳取之古破邪序巧爲蠱生死自有  
天禍福人自取報施豈是佛爲主君不見太史傳  
奕年至八十五

勸一言

李猫建議恩忽殊崔袁之輩皆面諛顧命大臣執  
不可此事固當且已乎廢立取決勸一言回天有  
力何不圖陛下家事不合問一言喪邦罪可誅昭

儀后司空功身賚璽綬冊中宮勲名曾重凌烟閣  
好配瀛洲許敬宗

鸚鵡夢

唐變爲周在天痛故使后姓飛入夢后召國老問  
何祥狄公從容危言諷陛下二子皆龍章一在東  
宮一在房二子不起兩翼折二子若起兩翼張姪  
雖至戚不祀姑陛下捨子將安圖后心悟鸚鵡飛  
房州迎得廬陵歸廬陵歸五王功業何巍巍天下  
又歌桑條韋

魯星村曰起筆奇偉  
結處又別出一意

謫仙斗



李白生自大羅天偶然游戲來人間自稱臣是酒  
中仙揮毫落紙如雲烟高將軍楊平章大臣折腰  
望寵光布衣嘯傲黃金殿奴婢麾之天子堂長安  
市上盡三斗沉香亭畔傾御酒朦朧醉眼識英雄  
再造唐家功不有君不見李白保汾陽願以家百  
口

軋犖山

軋犖山戰鬪神之宮禱其祠生猪龍當殺不殺張  
守珪當守不守楊國忠入潼關據洛陽官軍百萬  
莫敢當家賊一刀血滿牀史賊竊其餘中原又烽

火河北從此捐唐業與俱墮吁嗟乎李啟禍楊速  
禍明皇實召禍

凝碧池

唐天子愛梨園梨園之中大有賢漁陽鼙鼓走乘  
輿凝碧池頭奏管絃奏管絃宴公卿駙馬宰相來  
稱觥但知今日樂不念舊時聲擲器於地西向哭  
乃有樂工雷海清

白衣相

京兆小兒善屬文出入禁中事四君白衣從帝在  
靈武定謀決策多奇勲迎上皇爭儲王處人骨肉



事非易一言侃侃實安唐建制俱能做古人運籌  
竟得淨妖氛豈有黃老不言命乃來台輔秉國鈞  
前有輔國張良娣後有元載魚朝恩赤松一遊誠  
避禍故爾託言好鬼神

合公來

陣前傳呼聲如雷免胄釋甲合公來下馬前執葛  
羅手爾今負約何為哉諸軍羅拜會長跪懷恩欺  
吾吾到此懷恩為天殺合公又在是敢與合公戰  
願為合公死為擊吐蕃以謝耳願左右取酒誓有  
負約者軍前死醜酒酌地一軍喜此行安穩巫有

言見一大人今果然大人大人國元勳朝廷方用  
魚監軍

鼎折足

朝恩執易昇座坐天下大事當由我宰相何人敢  
側目今日聽講覆公餗當時宰相果何人怒者笑  
者俱羞縮何怪衰相現前奴公然譏爾鼎折足君  
但知鼎折足何不思馬指鹿小人同此其刑剝  
膚及牀竟不識一旦元載奉密勅果然笑者不可  
測

母不哭



將軍逐賊走賊出掩其後帝曰忠臣結蒲爲首賊  
曰忠臣結蒲爲身帝哭賊哭高重捷有母不哭李  
日月

入蔡州

辛未夜雪愬進兵黎明直抵蔡州城汝南晨雞喔  
喔鳴城頭鼓角音和平三十餘年官軍至蔡州城  
中人不驚常侍傳語聲如雷元濟牀頭夢始回功  
成蔡定不自有鞠場屯待相度來相度來愬迎拜  
願公勿避因示蔡使知朝廷果尊大他日韓碑記  
蔡功惟斷乃成相最崇推功讓度本愬衷

侍郎來

三軍謹侍郎來魏博以刻而見殺爾曹生亂又何  
哉我輩不知義今乃聞公言爲公解圍出元翼此  
易事耳吾何難裴大臣李元勳數年頓軍堅城下  
朝廷莫能息兵端侍郎來三軍謹

凍雀謠

長安烽火墮城郭鳳翔邠州又遷洛紇干山頭凍  
殺雀何不飛去生處樂網羅旣張鷹鷂攫搏雖有  
羽翼欲去安託郭汾陽之已亡李西平之不作安  
能一舉而九萬里之間兮相與翱翔乎寥廓

伯甄溪曰



極似  
古諺

### 豹留皮

王鐵鎗鐵不移人死留名豹死留皮武夫不知書  
何乃作此語剋敵在三日疑者真小鼠斬吾頭灑  
吾血全吾心完吾節朝梁暮晉豈所屑惜哉將軍  
事失人壯哉將軍心不折王鐵鎗真似鐵

### 天書降

澶淵之功翻為辱封禪之議何多欲王旦得無不  
可乎回天未必無良謨奈何文正也模糊天何言  
哉豈有書鴟尾黃帛合祥符欽若曰然帝曰然杜

鎬丁謂咸歡呼奈何文正也模糊當時空歎李文  
靖何不早薦孫龍圖

龔欣書曰  
宛折有味

### 黨人碑

焚元祐復紹聖官家別用一番人蔡京蔡卞同執  
政大書一百二十人元祐元符文武臣至尊大人  
親書名頒之州縣示萬姓示萬姓碑碣新嗚呼乃  
有號咷痛哭乞免之安民

### 和金議

罷李綱謝金人罷趙鼎謝金人靖康建炎同一轍  
前相汪黃後相秦封豕長蛇飛食肉言和用兵計



何毒敗盟南下非一日胡竟前後相覆餗岳侯既  
死韓侯歸和議成矣宋社屋江南甘作小朝廷五  
國城中帝鬼哭

半閒堂

襄陽垂破國將亡榷場旣置敵勢張江南淨土一  
寸無丞相乃築半閒堂天理昭昭胡不悟送君且  
往循州戍屏姬妾奪寶璐撤轎蓋暴秋煦木棉庵  
虎臣怒殺此賊民冤蘇此時問君君閒乎

一小卒

狀元宰相留承旨金枝玉葉趙學士可憐陳宜中

也曾稱君子遁耶降耶如兒戲國亡何與吾輩事  
官銜牙牌書不盡何論江西黃制置黃制置君勿  
說今日大臣多爾列莫與文陸比名節生爲宋人  
死宋鬼但看米立一小卒



琴士詩鈔

卷二

涇縣趙紹祖著

孫同璋曾孫

鵬飛蛟起

同校

讀五代史小樂府

庚寅之秋余以疾閉戶作讀史樂府數十首至十月而有起色又時迫郡試故五代以後殊草草今春夏之間復嬰小疾乃取歐陽公書逐卷觀之意欲補作惡其與前同一機調易為小樂府既成刪而成若干首於左

叔肖巖曰其源出於王漁洋讀三國志雖婉麗不及前人而直截了



當亦有前人未能逮者正自同工而易曲  
兄頴存曰楊廉夫平生自負其小樂府  
無人能及而漁洋老人稱孫豹人諸  
作可繼前美惜乎當日未及見此

嗚呼白馬禍朝堂空無人奉冊來勸進乃有唐六

臣唐六臣

唐家三百年一旦輸與賊天子何負汝朱三爾作

得爾作得

倉卒萬春門斬關夜三鼓昔者臣弑君今日子殺

父子殺父

一門禽獸行有婦多侍翁不謂賀王妃乃出梁之

宮賀王妃

尙讓巢宰相時溥國忠臣可笑卿門地言之殊辱

人卿門地

酒置三垂岡樂奏百年歌有兒能代我爲樂當如

何兒代我

朱甲空自雄刺史當誰補大言陳野父不及周楊

五

死節與死事不取周德威九原如可作從歐問是

非二首周楊五

父子三十年轉戰爲唐室冊梁副使來又進畫日

筆畫日筆



臣本一老奴本朝舊勅使血戰爲何家今王乃自取負老奴

崇韜一代才自附汾陽後何怪劉皇后宮門答劉叟答劉叟

鄙哉郭氏謀欲獲立后報豈知李環搃但奉中宮教中宮教

老矣此竒兒誰非豚犬者何知李亞次變作李天下李天下

魏州兵忽變汴州門不開君臣意氣盡泣下登愁臺泣愁臺

威福傾人主碎首死倉皇獨有區區志未能除璐王除璐王

阿三亦能戰居然南面王如何心膽墮不敢說石郎心膽墮

割地又輸金稱臣復稱子白溝日夜流不洗石晉耻割燕雲

死國安所逃可憐桑維翰鑄錯割燕雲羞此一尺面一尺面

十萬橫磨劍大言亦自雄如何扼吭死不死戰場中橫磨劍



道旁皆飲泣地下恨難消寒食明宗墓曾無一盂  
澆一盂飯

不知郭允明弒逆因何故歐公或闕疑還當問劉  
恕問劉恕

佛身尚可捨何況像鑄錢西方果有佛首肯世宗  
言像鑄錢

文伯名世才所策無不中惜哉周不能其言驗於  
宋王文伯

異事乃有此馮道比孔子快哉歐陽公斷以無廉  
耻無廉耻

時來盜有道運去臣凌君鬢髻為蒼鵠灰目徐叅  
軍為蒼鵠

風雨雷公塘勇夫骨自躍壯哉朱瑾墳能已淮南  
瘡雷公塘

不失孫仲謀玉帶與名馬可憐真英雄甘心為梁  
下真英雄

衣被畫雲霞宮室擬瑤闕望之若神仙祇為入草  
物入草物

世世修降表莫為李昊羞今日無諸葛當年有譙  
周修降表



嗚呼五代時何事不可歎果然王荆公不曾仔細  
看仔細看

車遥遥

車遥遥車非遙妾心遙似長安道出門咫尺即萬  
里為君切囑歸來早車遥遥空相思車隨君君知  
之腸中車輪君不知兄頴存曰古音古節直逼漢魏

烏夜啼

織雲四卷天如洗皎皎露華落井底有女出汲夜  
灌花手攀花枝望月華郎船今泊衡陽浦應聽烏  
啼思妾苦

君馬黃

君馬黃我馬白誓結生死交同遊長安陌朝看洛  
陽花暮泛赤城霞君馬化為龍乘雲踏霧天之涯  
我馬走海角終歲偃蹇服鹽車一旦求君遇君中  
野望見君乘高車駕黃馬回首瞥見白馬者低頭  
不顧揚鞭下

臨高臺

臨高臺悲風來上視齊浮雲下視超塵埃落日萬  
古色坐見長風扇海滄溟開緬懷往蹟我心生哀  
往者已矣來者不息今我如何曷其有極黃葉隨



風零落四野晨露沾襟爲之泣下茫然天地迅如  
野馬寶劍不利什襲堪藏壯士暮年志在心傷登  
高進酒摧我中藏

妾薄命

九疑山高湘水深與君恩愛知妾心知妾心恃君  
愛不虞一旦棄置妾昔如在枝花今如辭樹葉娶  
來新婦傾城姿朝朝鏡裏畫蛾眉不道新人不如  
故但願新人無故時

行路難

攬轡欲何從或向南北向西東僕夫執策催前路  
馬上躊躇問碧空城邊桃李花惜別一一吹逐馬  
蹄風行路難君莫去遊子飄揚悲柳絮千山萬水  
多棘荆一客孤行豈無慮迴前車解驂馬依然蓬  
篚破牖下世間誰可同行者

懊儂曲

金風飄雨何忽忽藕絲宛轉細如髮抽絲絡雨織  
不成交刀拋落龍梭歇空機黯淡雙蛾頰人生不  
比鷓與蜃黃姑織女隔天河七月七日輕飛越天  
上銀河夜夜明河邊明月出復沒有心看月光更  
西無心對鏡寒澈骨妾心如鏡鏡常圓郎心如月



月恒缺愛郎祝郎願吾郎但作十五十六月

休洗紅二章

休洗紅洗多紅色墮紅墜猶然可紅污愁煞我爲  
君珍惜嫁時裳春風不啟歲鞋鎖  
休洗紅洗多紅變白不恨紅不鮮但恐白不潔人  
生百年亦幾時何懼憔悴變顏色

莫愁曲三首

秦淮打兩漿艇子石城西望見莫愁湖盈盈隔一  
隄

莫愁湖邊女日日湖上遊采蓮復采菱不上秦淮

樓

秦淮樓上女蘇州又揚州小名雖有錄若箇是莫  
愁

商旅行三首

昔經樊鄧役阻潮梅根渚今日梅根人誓不出商  
旅

齊梁估客樂變作商旅行估客樂不歸感憶傷儂  
情

儂恨郎心專不恨郎心變不是不相思利重情便  
淺



團扇歌二首

妾自行在左君自行在右何以隔中間團扇常在  
手

團扇復團扇持許自遮面不是羞見君理不當相  
見

河之水二章

有小兒偶為竊盜其父夜溺之河他日有  
傳其事者趙子悲其就死之言為作二章  
河之水流不止父在河邊子河裏父命兒死兒不  
違霜露侵人父速歸

河之水流向東父在河邊子河中兒今雖悔悔不  
及他日父弗思兒泣

丁字簾前十四曲

丙午四月至八月余寓居秦淮之鈔庫街  
隔河相對皆倡樓也目之所見耳之所聞  
胥於是矣坐懷不亂尙愧昔賢閉戶不觀  
知非勇者故作十數曲以盡其情隨手掇  
輯都無倫次義有託於箴規聲則取諸子

夜兄穎存曰語近情真別饒風趣宛然齊  
梁人口角而寓諷刺於風趣之中讀之  
可以醒醉不是齊梁人一味  
靡曼只作蕩子迷魂湯也



歡去儂獨坐儂愁歡不知憑軒故自遣鴛鴦又在  
池  
香囊垂四角玉牀理錦褥今夜歡不來歡在誰家  
宿  
阿母愛金錢教儂學強笑儂笑自有真祇對白門  
少  
兩兩復三三儂祇得一身歡莫打夥來一日來一  
人  
白面誰家郎不慣遊春風小艇水閣邊見儂面發  
紅

歡住古長干數日不來親背後寄相思近前故生  
嗔  
姑蘇好歌兒十三四年紀船前學窺儂一種可憐  
子  
洛陽有大賈公府有長吏先來復後到教儂難爲  
計  
今日歡來別說到揚州去揚州多狹邪歡切莫久  
住  
接屋誰家女姓張又姓李近來攀作親說是儂家  
姊



畫船何處客呼儂儂不識面貌尙依稀姓名記不得

門前紅告示說趕儂別徙昨日大官長小帽儂家裏

歡囊忽羞澁不如且歸去歸去莫浪費明年來此住

屏却白團扇作計留熱住祇恐涼風來遊船從此去

四言

寺館

晨星煌煌零露瀼瀼我行其野就我友朋爰館于寺置几安床我書旣陳我琴旣張偕我同人步出前廊有松當門鱗鬣具揚一枝飛來倒挂于旁友曰千載綿歷漢唐嘉樹可譽得人斯彰胡然偃蹇植此僻壤酌酒其下慨當以慷

自勗三章

立德謂何太上所難矧余小子而敢自賢自家及族至于閭閻謹爾威儀慎爾語言非曰能之惟是勉旃立德甚難存心要焉

立功謂何有位所致惟予小子未側下士此何能



爾惟力是視無因勿干有責勿委勿以善小不爲  
而止立功甚難視力所至

立言謂何昔賢所選矧余小子而敢不勉經史子  
集嘗鼎一臠浮華必屏奇詭必辨菽粟布帛實永  
而雋立言甚難尤在躬踐

舅父翟雲樓曰詩不必  
佳汝小子能言及此企

余望  
之

### 招友

我徂東山嗒焉無偶折簡走僣爰招我友我友不  
來方事南畝反招我往烹黍以候子不我來我不  
子就此有嘉肴此有旨酒有筍有蔬以斝以斗陶

然高歌探我二酉帶經而鋤子有所受下帷不窺  
吾亦有守企予望之期以不朽



琴士詩鈔

卷三

涇縣趙紹祖著

孫同璋曾孫

鵬飛蛟起

同校

擬古

江文通雜體三十首論者頗有異辭然自是褚摹蘭亭已到妙處正恐文通復作亦似李廣射虎不能更穿石也今但取其所未擬者別作十餘首非欲求新避其鋒而

已

袁簡齋太史曰詩從文選入手是唐人正宗但當取其精英捨其糟粕耳此擬古十數首得前人所未有吾愛之重之

潘蘭如曰擬古諸詩古質清麗各極其妙



陸士衡而後罕見其匹 叔雲起曰文通擅長千古作者自謂欲避其鋒然統觀諸作亮音高節置之古人集中不復能別正恐前賢畏此後生

蘇屬國別友

悲笳中夜發塞馬徘徊鳴起視夜何其屋角星縱  
橫歸人戒征鞍念子不能行穹廬置尊酒聊以慰  
遠情昔者居中士兄弟視友生何況當異鄉乖離  
不復并河漢有曙色絲竹無歡聲美酒酌大斗涕  
下難為傾黃雲玉關來羈愁交相縈所恨無羽翼  
挾子俱遠征叔肖巖曰起境蒼涼是漢人語 章犀臺曰置之漢人集中有何分別 又  
非貌襲也 妙在有真氣

孔北海述志

黯黯炎精衰赫赫當塗盛權臣亂天紀挾主盜國  
柄孤忠貴盤錯疾風知草勁伊吕起耕釣自謂識  
天命夷齊慕高潔惜哉力不競安能託餘輝借以  
自燭鏡幸不惜巢卵努力禦梟獍狂夫笑濶畧中  
酒為余病所願結志士心親無貌敬靡鬲亦燼臣  
竟能反夏正叔雲起曰拉雜反復慨慕無端逼真  
悲涼詩境 彷彿似之

秦士會贈婦

暘谷飛金烏碧海騰玉兔結髮曾幾時離別轉多



故清風動蕙帷房權時反顧念子如在前多為形影誤遣車既空返省書不能語道遠難驟歸何以展余素願言進鍼藥保愛幸自護衣裳慎寒燠服食節朝暮轉輾迴中腸憂思不可吐

曹孟德憫亂

董卓肆暴亂王綱殊不申山東兵自戕勢利還相吞嗟余奮袂起次第殄妖氛恩威及遼遠王靈亦已振衆口不能諒邪說叢一身豈不決勇退履虎還啞人緬懷蒿里歎悲怨不可論生為周公旦死表漢將軍叔肖巖曰清勁絕似孟德章犀臺曰又似左太冲

陳孔璋遊覽

公府罷高讌夾道散簪纓歸廬少憇息念言尋友生友生不可尋逍遙步園亭月出天宇淨照我池塘清浩然發長歎欲語還吞聲不悲功名暮所悲歲月傾文章違宿志鐘鼎安可銘太息反房寢獨坐涕縱橫盛春谷曰頗采孔璋原句成章文章違宿志一聯乃令我為孔璋一哭原詩那得如此警絕

郭泰機答友

無米難作炊無絲難理機織成五尺絹不足裁為衣今子案左右萬匹任所為况復秉刀尺持之將



衣誰不惜我無衣惜子衣者非子倘得其人我寧  
霜澈肌空懷衣被心竟為寒素悲

盛春谷曰  
意婉語深

謝宣城治郡

民俗快陶甄皇恩欣布獲案牘有餘暇邱壑縱晚  
步綠皺春穀泉紅滿陵陽樹脩脩風吹裾離離草  
沾露葉動輒歸鴉林隙走飛兔勝景常若斯流光  
不可駐紆紫衆所欣畫錦吾獨慕願言返東田幽  
蓬葆衰素

章犀臺曰清  
遠不愧擬謝

王元長古意

明月不解事隨風入幽房庭草淒以綠馥馥有餘

香金釵卜長夜玉袂無容光杜宇關山暮鴻雁東  
南翔思君隔千里涕下沾衣裳

盛春谷曰音節自  
然無絲毫湊泊

沈休文愁卧

東園草木新卧病愁轉侵但覺風習習不知春深  
深蛛絲巧當戶飛花時點襟坐看日過隙倦聽鳥  
嘯林物態變朝暮美人懷素心流光迫奄忽早此  
抽朝簪

柳吳興壽衣

登高望遠人愁思日暮起別浦少歸帆寸心結千  
里青斷巫山雲綠滿洞庭水砧杵落明月聲聲秋



不已

任彥昇講學

下灘舟勢疾上灘舟勢緩舟子筋力疲舟移如尺  
短失勢力不齊一落數丈遠要當爭中流勿使舟  
倒轉嗟余本踈惰淺學滋醜腆古人收桑榆君子  
貴強勉不植將自落有收服乃畎終始欽說命慎  
哉半途返

袁簡齋太史曰語意警絕過原  
詩遠甚此篇正以不擬為佳

王蘭陵寫怨

門前新人來閣後故人去落葉已辭枝遊絲猶繞  
樹願君日即新亦或時憐故棄人勿棄物衣我手

織素

宿田家書所見

日暮傍田家叩門欲投宿啟戶有老翁相逐入其  
屋告以近市人偶然來山谷為問今年荒田家恐  
不足老翁聞我言色變意轉酷答言去歲歉家猶  
有餘蓄今春連夏雨無麥復無粟合村婦子號一  
日不再粥縣令不報荒催科似火速追呼已難當  
加之以鞭扑嘆息言未已兩吏來相逐老翁急避  
走入門肆督促向客索主人似訝面小熟亟去適  
鄰家隔籬聞索穀捉雞徑出門村店換酒肉

伯甄  
溪曰



樸實寫去如讀  
元次山春陵行

詠古

高辛妃姜嫄出修郊禘祀遂開周家業八百基所  
 始帝聖妃更賢持身端其履天意欲隆周聖母生  
 聖子豈有大人迹而以足踐之稼穡以粒食聖人  
 應運垂聖人應運興何藉靈異辭乃令後世人千  
 載有疑思盛春谷曰神靈之生詩人之體正不妨  
 迷離恂恍以見造化之奇然論自正大  
 首陽有商民誓不食周粟欲明萬古義不求一已  
 祿義士何代無要在景芳躅世歷三千載西山不  
 可磨試問表忠觀孰先采薇歌

管子天下才三敗不為耻一朝使作相齊國臻上  
 理大矣攘楚功霸業之所始苟非鮑叔薦久困堂  
 阜死生我者父母知我者鮑子章犀臺曰敘事以  
 勁氣出之不著議

論中自  
有議論

晉侯從亡者介推最好名賞功祿不及隱綿不求  
 榮獻公子九人惠懷皆無親既知天有命何乃出  
 怨言反覆以自明詎謂焉用文

夫差得西施父讐不復憶世謂勾踐強獲此美人  
 策歌舞亦偶然豈便能亡國爭晉猶得先滅越詎  
 無力失計是伐齊軍疲士乏食沼吳在好兵非祇



由好色盛春谷曰正見好兵之甚不可寬一層實緊一層

魯連世奇士一笑揮秦兵信陵乘其銳直抵咸陽城百年一快舉此後無嗣音豈徒能存趙實有宗周心功成拂衣去糞土視千金

始皇并六國經營萬世畧欲弱天下人銷兵墮城郭中原取民脂海上求仙藥天子而神仙快事那可得徐福去不還山鬼來獻璧

古傳秦皇鏡皓皓察秋毫忠奸不並列鬼域難潛逃宮女亦何辜小過誅爾曹既云照膽明何不鏡趙高伯甄溪曰一說破便成千古笑柄

一擊中副車秦王未應死始知天有意荆軻亦如是但譏劍術踈毋乃悲壯士不然秦政亡扶蘇作天子守成有中主富強尙足恃天意欲亡秦未必速如此兄穎存曰意本前人而出筆朗朗別饒姿致

漢之所由帝功勲兩釣臺子陵隱巖灘早賦歸去來韓侯不解此乃及未央災人苦不知足功高何在哉兄穎存曰起筆簡鍊有力

挾客遊關中子房心舊主借漢以報韓滅秦更覆楚故國已云亡戀戀猶如此哀哀淮陰侯豈非韓孫子如何未央宮王孫竟慘死釁起躡足王忍心



詎至是

李陵既生降士夫咸不齒太史陳其功遂抱蠶室  
耻慘淡河梁別涔涔不可止借茲故人行洩我心  
中苦泣下為龍門因以別蘇武知己良獨難忍令  
長終古

盛春谷曰傷心人別有  
懷抱非直賦其事也

劉禪信孔明事臣如事父一德邁聖明非獨推肺  
腑隆中定三分出師竟何補盡人不問天老臣心  
獨苦哀哀白帝城臨終疑乃吐孺子倘不才君須  
自為取知亮實不深尙未及後主

後主實  
為難得

盛春谷曰先主  
一語幾殺孔明

文若一代才事曹尤盡力既為魏子房佐命亦其  
職騎虎勢已成而乃阻九錫一死良獨難用心吾  
不識

獨坐有感

秋風襲我衣秋露濕我裾秋氣逼我體秋雲遶我  
廬秋月知我心徘徊立古壁照我癡頑影憐我山  
居寂山居亦有年明月伴我久何以持贈君酌此  
盈觴酒

潘蘭如曰  
格調獨創

伊人何所在乃在山之谷我欲從之遊可望不可  
卽白雲藏其身秋水遶其屋搔首徒悵望烟霞障



吾目

田家有紫荆兄弟分析之草木有微情萎此芬芳  
姿兄弟意感格從此誓無私仰視庭中樹燦燦垂  
華蕤微物尙如此人心何所虧

龐然水底石不與水面平將石投水底鏗鏗其有  
聲音沉形亦滅安用初錚錚富貴固徒爾虛名復  
何榮齊景一何愚牛山涕縱橫銘金與沉碑寧益  
身後名

遲友久不見至

美人橫素琴一彈一清心山水非我意相思在知

音寒鴉叫不已落日歸深林

過半野居同兄庭山訪僧西印不遇

高人無一事客到始開門吸取澗中泉同煮梅花  
根幽興不可已漫踏招提路重門多積葉落日隱  
寒樹白雲滿空山采藥知何處

贈吳姓二童子

一名鑑一名拱辰

吳家有二童小時能了了出語頗從容舉足不佻  
巧詩賦似成人經義亦通曉古有張童子未必若  
斯好惜吾非昌黎烏能進以道世俗重功名學人  
矜才藻詞華固末技未足資探討况乃駢與儷掇



拾殊草草不朽首德功立言當及早聰明幼則奇  
烏可恃以老幸勿迂吾談年華去如鳥富貴恐逼  
人榮名以爲寶

洪北江太史曰格調  
氣韻俱似蘇長公

哭季春兒

寒氣逼瘦骨凜冽欺病體我疾初得愈天禍未肯  
已春兒週歲半遂乃遘疾死憶昔兩年前驚風喪  
爾姊哀哀爾祖母痛惜未有解及至去年春三月  
得生爾祖母始開顏一家皆欣喜取名季春兒視  
爲掌中寶爲爾排八字關煞多可駭恐爾壽不長  
將男呼作女不復呼爾名且復呼爲婢今年春三

月乃爾週歲期亦知呼爹媽亦知喚祖母爾母病  
羸弱乳母又無有爾既欠乳哺體弱不能走秋來  
七月中爾父爲病累起立待人扶醫藥待人理祖  
母抱爾來戀戀依床第指爾慰我心嬉笑以相視  
慙慙三閱月閉門還擁被九月十五日爾母生爾  
弟爾父方病愈扶杖乃能起爾母初解懷湯藥從  
此始無人檢點爾凡事責婢子婢子不小心生冷  
任爾餌不爲計可否但願爾啼止肺腑受寒深病  
根伏在是肌膚漸瘦削精神漸委靡始急爲爾謀  
救遲終何裨卜禱神不靈參苓投如水冬十一月



初舍我長已矣哀哀爾祖母悲傷入骨髓爾母又  
女流號啣淚如雨愈傷祖母心痛哭禱可洗因之  
強言笑未敢輕揮涕豈知心斷絕百折腸瀾瀾福  
澤避寒儒命蹇已如彼何當兒女間摧殘又若此  
悶悶夜漏長恨恨何所底作詩以代哭蒼天其鑒  
否叔雲起曰無一語不真讀之令我心惻一語反  
臺曰真氣傷人心骨讀至福澤避寒儒一語反  
使無限亂絲  
一刀斬斷

致兄庭山

吾兄富文章弟時猶未弁不以幼見遺商推到筆  
硯砥礪經術中快逐文場戰教弟慕古人指點及

紀傳相謂同一心兄面如弟面如何數年來乃自  
趨安便中道忽棄余躑躅追時彥昨者寄弟書責  
以負舊眷讀之未及終心驚肉已顫弟學古人學  
豈因親愛變功名尚不貪肯為酒肉戀世俗誇結  
交變態如轉電兄或偶入之自試鋼百鍊薰蕕器  
不同黑白光易眩吾兄幸聽弟莫以規為瑱叔肖  
巖曰  
樸擊古道交  
當如是也

贈孫竹泉 名聖範宣城人

江城偶縱步逢子書肆中翩然年少客意態凌飛  
鴻買書數百卷縱橫論不窮作賦鏘金石學成耻



雕蟲謂余無點俗自許意氣同苦邀至其家置酒  
何從容今夕此何夕歡讌燒燭紅明朝策馬去一  
別如秋蓬願子執高節努力期令終

同叔肖巖梧江雲起兄采臣纘侯晚過幕山  
寒風已颼颼楓葉尙未落林間一片紅映日入城  
郭追隨南北阮言尋大小幕山路苦傾歆炊烟靄  
叢薄上方發鐘磬暝色赴巘嶸到門興已闌修竹  
差不惡僧雛邀入寺祇此憇行脚小住亟回翔林  
端響歸雀

浴佛節家廟祭祀四十四韻

水木有本源饗祀盡孫子百世合吾宗一廟不愧  
士率祖義則然灌佛事徒爾子敬雖云賢恐未燭  
厥理吾祖簡靜公舊族本天水自宋南渡來洛陽  
遷於此屋繞賞溪流門對西山峙遺種在僻壤聚  
族結仁里迄今五百年子姓無他徙縱未大閭門  
願言敬桑梓家廟城東隅堂構誇煥美長橋跨兩  
塘䟽櫺映百雉外室敘彝倫內寢安祖妣時祭分  
各支節日有小祀四月浴佛辰潔齋進筵几高高  
祖歆閣公爲是祀始設田備酒脯歛資奉簠簋遺  
我後之人世守纘前軌及期先戒事夙夜自勤止



黎明集族人俱入廟中俟主祭擇德賢亦或躋臚  
仕奉盛潔可告獻爵酒其旨與祭分兩行左右列  
邇迤燦燦袍則新峩峩冠則頰勢踈地則親服盡  
序可紀位次依昭穆同則先年齒拜跪聲不譁趨  
踰足斯跂一氣通冥靈一堂肅瞻視徹俎尙矜持  
畢祭無徒倚頌胙徧紳衿老壽常倍蕝設席延所  
親降福體神指諸父及兄弟具慶徵燕喜獻酬爵  
無算祝頌歌樂只但有度禮儀自不驚箸七翩反  
戒角弓本根庇葛藟世世常若茲綿綿其未已我  
思古聖人制禮真無比微能體人情迹不矜竒詭

遂使人子心各得盡其鄙巍巍吾祖先古佛豈不  
似存禮以事亡生禮以事死小則供盤殮大則備  
牢豕何須下金鏡用以禳福祉借彼釋氏功遂抱  
儒者耻

盛春谷曰整襟一讀使人孝弟之心油然而生

齋中對月

金井生涼颺銀河橫素影忽見白玉盤照徹衣裳  
冷獨酌不成歡佇立清夜永豈無素心人道遠路  
則梗願言寄相思同此月耿耿

山中早行

前山多白雲雲滿山無路行行雲之中身近雲忽



去漫漫禦我前冉冉隔數步迴首望舊途雲已迷

來處同行四五人咫尺失相顧不見雲中行但聞

雲中語盛春谷曰非此筆不能寫出此情景叔

味在酸鹹之外者

### 哭兄纘侯

嗚呼纘侯兄舍我長已矣念同歆閣公六世從兄  
弟重之母族親况乃年相似少時共嬉戲往來無  
彼此兩家父母間皆作兒子視稍長能讀書每使  
同硯紙前後十餘年聯床聽風雨句讀細商量文  
章相礪砥方當期有成詎意竟至是先是兩三日

弟聞兄病殆亟來候視兄執手坐床第猶憐弟形

瘦母乃憂憤積又自言病源寒深食作痞胸次冷

如冰快意須熱水僅僅間一日復來問愈否搖首

不能言指口惟以手醫藥既罔效沉疴遂加駛得

疾日五週嗚呼竟不起上有雙老親半百多年紀

下有五歲兒零丁從此始所係身不輕何以棄如

屣嗟我非木石轉輾情曷底恨非曠達人彭殤一

生死念之每氣結中夜不能止撫心忽自疑疑在

夢寐裏叔肖巖曰情真語摯閱之令我心傷潘

曠達人沉痛尚可讀耶



詩成情不能已復作二首

生別猶惻惻死別真吞聲何意千金軀棄如敝屣  
輕文章總壽世時命嗟不平生前苦寂寞何用身  
後名感喟摧中藏百折愁交并

轉輾不能寐披衣當前楹春風動帷幕蕭颯作秋  
聲念之自淒切非關氣候驚別院寂無人素輝流  
空庭譙更苦不息雜聞子規鳴隻隻方寸地搖蕩  
難為情不知肝腸斷烏禁涕淚橫

與雲起五叔論畫竹

昔者薛耀亭自矜工畫竹我意殊不然疑其力不

足今者後鐵峰自云畫竹工我意又不然謂其力

太雄耀亭名球如阜人鐵峰名禮無為州人我輩雖不畫要貴知畫

意但使得其神不在誇能事在昔文湖州真妙俱  
並臻息齋真不妙東坡妙不真古人不可見古語  
今則聞聞叔近作竹此事當細論

題從兄師臣印譜後

史邈久不作古意漸已淪吾兄靜者儔豪氣復邁  
倫高懷薄典午劇欲追先秦當其執石時端坐如  
木人目精不搖蕩心精潛屈伸咨嗟未下筆力已  
透蒼琅冥搜入奧竅豁然見其真舉腕不停掃白



雪揚飛塵鏗鏘中金石風雨入鬼神如開羊腸路  
一線杳無垠又如勢破竹一下直到根又如庖丁  
屠奏刀無逡巡及其更十九芒又猶若新啞然忽  
自笑擲筆豎嶙峋淋漓染腥血璀璨堆白雲庶幾  
古銘刻如彝器雜陳高雅令人慕莊嚴不可親造  
詣有若此安用數李甄

閱盛春谷詩有武陵姚卓亭者與李澄湖訂  
交甫八月而澄湖卒卓亭爲刻其詩以傳  
余不知澄湖之人與詩何若獨感姚君之  
義足以勵世厚俗不能不三致意焉

古人諾如金今人棄如土世故多周旋論交竟何  
補所以王仲回不敢易言友况如杜陵詩翻覆作  
雲雨古稱管鮑交次則陽與禹姚君獨何人義與  
古人伍訂交淺淺耳但以心爲主不易平生言竟  
至鬼神吐遂使錦囊人心血不虛嘔當其論交時  
未見出肺腑及其更生死不肯輕首鼠因知故人  
交所貴在要久淡者日以親濃者難爲後慨吟春  
谷詩茲事已千古

喜盛春谷至

春水上小堤春風拂楊柳山中樂方深忽念烟霞



友孰意翩然來一笑遂把手僮僕解吾心奔走沽美酒擊節賞新詩好我忘其醜健談寐不成曙光穿戶牖

櫂歌行

鼓櫂莫愁村乘潮上水門乘潮來復去莫問妾家住妾家住橫塘門前藕花香採蓬不採花妾心紛如麻妾心不輕吐蓮心獨憐苦心苦那得辭輾轉誰相知相知一片月照妾櫂歌發

汪醒菴曰六朝遺韻

木末亭

勝地據梅岡孤亭當大路北有景公祠旁有方公

墓二公事始末牧監知其故指點說忠孝往往泣相顧足知人有心賢愚非異數取仁心則違見義力不赴美惡豈不分富貴動浮慕早知隙中光不敵草頭露三楊擅相業六州錯難鑄

江行示同舟諸子

擊汰發石頭揚帆指采石狂風偃蘆葦宿霧迷咫尺陰陰秋雨沉漠漠水雲碧舟人貪程途船頭頻指畫水聲急潺湲客子變容色大江流萬里所爭在片席豈以千金軀而爲一屣擲願言遠飈飛所苦無羽翮憂疑可如何見地奚褊窄須臾天氣清



倏忽波浪寂霽色開遠林翠螺插峭壁停舟艤近  
岸酌酒慰驚魄皓歌夜將闌江月半窗白

北固紀遊八十韻

時族兄偉堂爲鎮江府學訓導名帥字元一

遊山夙所好但苦鄉居偏吾兄在京口一席爲冷  
官襍被從之遊握手先言歡亟云北固好金焦都  
在前便理雙木屐提攜出北門路尋石羊巷碑卧  
天津泉狼石泉之左排列如蹲獠有懷漢帝備復  
思吳主權英謀豈合軌急難姑爲援隆隆兩裂石  
宛如試劍痕流俗喜附會荒誕不足信邈迤上龍  
岡迢遞出雲端探竒須鑿險履危恃心安弔兀見

鐵塔霄漢摩鸛盤陽文凸一面依稀記歲年目力  
不能到惆悵空復看樓臺隱馳道屈曲轉朱欄湖  
石半依樹梅蕊將衝寒凌雲亭上聳汪洋恣大觀  
仄足俯大江接手捫青天洶濤奔萬馬巨浸滙百  
川如何雙玉山浮來爭後先金焦分左右門戶開  
兩邊漁舟小如鞋一一相蟬聯同遊測其數慧眼  
誇精專我笑不能辨言尋原路還遂登石帆樓一  
梯踏雲間煙氣迷爪步餘霞散江干帆檣飛上下  
葉葉當窻旋因謁衛公祠入門見三賢長髯座據  
左不問知坡仙右者米海岳骨秀神自騫峩峩李



贊皇英風不可攀晉公差比烈太牢徒相譚堦前  
兩古柏手植今爭傳百尺仰參差十圍視團欒勢  
擬龍蛇走蝕滿苔蘚攢傾欹懼仆折撐扶資石磬  
甘露依山半入寺聊遷延古壁氣索寞佛像金新  
鮮稽古孫皓建紀瑞真自謾寺額猶依舊時代幾  
變遷蕭梁愈滋蔓崇佛好因緣鐵鑊有鑄賜在宋  
猶能完於今七百歲長埋荒草烟此物衆所惜吾  
意殊不然我思張僧繇丹青通冥元又思陸探微  
一筆畫如椽天人翔寥廓狡獬戲蹯跚神物當呵  
護豈意終摧殘空懷米芾史高吟子瞻篇吾兄靜

者儔訪僧過前軒徑通修竹綠堦侵細草妍山僧  
午自課素珠記一編翩然喜佳客輟經致禮虔果  
看鹽水煮茶當活火煎華嚴方誦罷相對談妙禪  
永叔收秘演潮州愛大顛但取道理足非關異說  
眩因心得頃刻迴步任彎環巍然寶晉院堂廡靜  
囂喧昔爲研山易今爲多士甄入室見石刻蘇米  
像翩翩香光跋其後書畫兩嬋娟剖璞玉已得探  
驪珠自圓撫摩三歎息餘者徒譏譏上方發暮鐘  
炊烟散小巒暝色鎖寒樹返照開夕曛淋漓滿懷  
抱彳亍反城闔言歸日精館共啜夜中餐撫几不



能語默坐心自懸自秦鑿曲阿茲山雄東南世歷  
 二千載遊者更萬千沒世君子惜盛名俗態謹彼  
 皆賢哲人或在當途班枯榮隔陵谷異代歎沉湮  
 而我何為者涓滴附大瀾空作小蟲吟徒為寒士  
 酸吾兄笑語我此事且勿言明當買小艇挂席遊  
 金山叔肖巖曰洋洋大篇而敘次分明讀之不啻  
 親歷其地何必以畫當卧遊也其詩品亦在  
 白蘇之問

同兄偉堂在中遊直指庵過魯子敬墓

尋山出城北聯袂緣山麓疎林聞磬聲茅庵結巖  
 腹地僻塵自清泉冽茶更馥白雲隱松杉微風滿

修竹山僧導客起小步還繞屋高塚俯荒邱傳是  
 古魯肅殘碣識署漢寒烟歎埋玉四野望蕭條墓  
 門草不綠會待春風深黃花被山谷偉堂云去歲  
 三月過此黃

久旱得雨書以誌喜

去年江南旱粒米如粒珠大矣

堯舜仁荒政傾內帑口食粗仰給殘喘延斯須需  
 麥恨春長性命與之俱大風揚黃沙晴雲流赤烏  
 汲水井華竭望隴麥畦枯書生雖不耕急雨如農  
 夫日夕望青天翹首雲有無今日何好日急溜灑



菰蒲天公元氣迴槁壤一霎蘇苗芽樹有枝抽青  
 圃長蔬麥熟可預卜兩米同一桴閭里民氣靜且  
 復思蓋儲吾亦樂陶然飽飯誇腐儒旁人忽大笑  
 君收幾石租

袁簡齋太史曰藹然有道之言一結乃涉筆成趣

登焦山

雨餘越城郭言尋焦山麓麥秀交微風柳芽出新  
 沐片葉渡春江千里一色綠古寺白雲深鶴銘留  
 片玉上有三詔洞焦公此息足何當古君子感夢  
 標幽獨真皇託神道此語恐虛瀆爰登峯外峯小  
 憇竹樓竹梵音落空山蒼茫迷去躅

和焦山僧巨超尋雷轟石舊處原韻

瘞鶴銘已出江矣巨超告余尋其舊處尙  
 得明賢諸刻喜而賦詩爲疊其韻酬之

懸崖有古碑風雨時爲掃徑窄常交藤石滑不粘  
 草瀕洞俯大江一氣流渾灝巨師游興竒聳身下  
 樹杪但鑿混沌開不顧山靈惱蛟龍測深窟猿猱  
 絕線道上有昔賢刻一一恣探討金石吾所欣到  
 處窮遐考恨遲三日來不與縉幽島輸師佳話留  
 傳之後人好况乃得新詩快如搔背爪隱見物有  
 時忍使鮫宮保

梅石居曰昔人不喜作和韻詩懼其牽強也似此自然流出那復有



可尋 痕迹

流俗但喜新古蹟厄一掃石幢埋寒煙心經委荒

草焦山舊有集右軍書陀羅尼石我來訪名山惆

悵春波瀨誰知巨超師鑿險踰木杪告我古刻奇

破我痴頑惱便欲理雙屐從師經舊道白雲失巖

端洪濤阻幽討豈不決勇往捫蘿快搜考嗟余賦

命輕未敢渺江島瘞鶴出寒崖佛壁斲亭好螭角

折轟雷雪鴻留半爪念言素心人愛護永相保元

一日疊韻詩全無拘滯之態真得髯蘇妙處

胡駿夫曰一片愛古深情讀之令人意往

別翟警卿

君雖居近市不作市道交自喜識貴賤遠接賢與

豪接交不在多所貴在久要粗豪亦快事人理細

如毛君子審擇人肯與俗士呶行矣吾何言勉旃

慎厥操

題朱雲峰林泉小憩圖

我性不好遊閉戶鑽故紙非謂卧作遊其實懶不

事九華與黃山徒然近尺咫况乃五嶽奇夢想不


到此雲峰磊落人慷慨蠟屐齒名山雖屢遊足跡

未肯止忽作小憩圖林泉耽彼美人疑遊或倦翮

翻思故里我謂小憩者意在翻然起奇勝徧天下



豈在一山水謝公所未經向禽願方始搜剔及幽  
荒迤邐徧遐邇有得無不書聞奇卽襍被歸來逞  
雄談助我證經史





卷之四